



9. janúar 2020

Umsögn Akureyrarbæjar vegna tillögu til þingsályktunar um Akureyri sem miðstöð málefna norðurslóða á Íslandi.

Bæjarráð Akureyrarbæjar fagnar framkominni tillögu til þingsályktunar þess efnis að Akureyri verði miðstöð málefna norðurslóða á Íslandi. Það er ljóst að málefni norðurslóða verða sífellt viðameiri og á það bæði við hér á landi og utan landsteinanna. Eins og fram kemur í greinargerð með tillögunni þá hefur á Akureyri byggst upp öflugt þekkingarsamfélag um málefni norðurslóða. Það hefur gerst bæði innan þeirra fjölmörgu stofnanna sem staðsettar eru í rannsóknarhúsi Háskólans á Akureyri að Borgum sem sumar hverjar eru hluti af föstum vinnuhópum Norðurskautsráðsins.

Einnig hefur HA, sem er hluti af Háskóla norðursins, gert sig gildandi á þessum vettvangi og sem rannsóknarstofnanir sem þar eru staðsettar. Þetta hefur gerst smám saman á síðustu árum og nú gjarnan talað um að miðstöð norðurslóðamála sé á Akureyri. Það hefur hins vegar ekki verið ákveðið formlega og telur bæjarráð afar mikilvægt að það sé gert, ekki síst nú þegar Ísland fer með formennsku í Norðurskautsráðinu.

Akureyrarbær hefur með ákvörðunum sínum um þátttöku í Northern Forum sem eina sveitarfélagið á þeim vettvangi, sem og með þátttöku í Arctic Mayors Forum sýnt að sveitarfélagið vill vera gildandi í umræðunni og ákvarðanatöku um málefni norðurslóða. Akureyrarbær fer nú með formennsku í Arctic Mayors Forum, sem var formlega stofnað í október árið 2019 og nær formennskutiðin yfir sama tíma og formennska Íslands í Norðurskautsráðinu.

Bæjarráð bendir líka á mikilvægi þess að fyrirtæki í sveitarfélaginu eru hluti af formlegum klasa sem nefnist, „Arctic Services“. Klasinn hefur það að markmiði að standa saman að því að sinna þjónustu við Grænland og verklegum framkvæmdum. Hann hefur síðan hann var stofnaður tekið á sig útvíkkaða mynd og mikilvægt að þessi vettvangur sé til, til stuðnings við annað norðurslóðastarf í bænum.

Með allt það sem hér er upptalið í huga telur bæjarráð vera einsýnt að staðfesta beri með formlegri ákvörðun að á Akureyri verði miðstöð málefna í norðurslóðamálum með það að markmiði að styðja við og halda áfram þeirri jákvæðu uppbyggingu á þekkingu og mannafla sem hér hefur átt sér stað.

Þá ber að nefna að í ný samþykktri Sónaráætlun Norðurlands eystra kemur fram í helstu áherslum á sviði atvinnu og nýsköpunar að “Hvetja til nýsköpunar í norðurslóðamálum og að Akureyri verði miðstöð fyrir norðurslóðastarfsemi á landinu.”



Ásthildur Sturludóttir
bæjarstjóri



ATVINNUÞRÓUNARFÉLAG
EYJAFJARÐAR

Alþingi

Nefndarsvið

Sent rafrænt á nefndasvid@althingi.is

Akureyri 9. janúar 2020

Umsögn Atvinnuþróunarfélags Eyjafjarðar um tillögu til þingsályktunar um Akureyri sem miðstöð málefna norðurslóða á Íslandi, 182. mál.

Atvinnuþróunarfélag Eyjafjarðar lýsir ánægju með framkomna þingsályktunartillögunni og hvetur Alþingi að samþykkja efni tillögunnar.

Með þessari tillögu er það staðfest að Akureyri sé miðstöð málefna norðurslóða á Íslandi líkt og oft hefur verið nefnt í ræðu og riti. Málefni norðurslóða hafa fengið mikla vigt undanfarin ár og orðin gríðarlega mikilvægur vettvangur í breyttum heimi. Á Akureyri eru margar stofnanir sem eingöngu vinna að málefnum norðurslóða en einnig mörg fyrirtæki sem hafa mikla reynslu af vinnu á norðurslóðum.

Án efa mun sú reynsla og þekking sem byggst hefur upp á Akureyri nýtast og styrkja stöðu bæjarins og einnig landsins alls.

f.h. Atvinnuþróunarfélags Eyjafjarðar

Sigmundur Einar Ófeígsson


Akureyri, 20. desember 2019

Nefndasvið Alþingis
Austurstræti 8 - 10
150 Reykjavík

Umsögn stjórnar Eyþings um tillögu til þingsályktunar um Akureyri sem miðstöð málefna norðurslóða á Íslandi, 182. mál.

Stjórn Eyþings tekur undir mikilvægi þess að miðstöð norðurslóða verði skilgreind á Akureyri. Fjölmargar norðurslóðastofnanir eru nú þegar starfræktar þar og mikilvægt að sú þekking og reynsla sem byggst hefur upp á svæðinu í málefnum norðurslóða verði nýtt og eflað. Í nýsamþykktri sóknaráætlun Norðurlands eystra kemur fram í helstu áherslum á sviði atvinnu og nýsköpunar að „hvetja skuli til nýsköpunar í norðurslóðamálum og að Akureyri verði miðstöð fyrir norðurslóðastarfsemi á landinu“.

F.h. stjórnar Eyþings



Helga María Pétursdóttir
starfandi framkvæmdastjóri Eyþings



**150. löggjafarþing 2019–2020.
Þingskjal 183 — 182. mál.**

Tillaga til þingsályktunar um Akureyri sem miðstöð málefna norðurslóða á Íslandi.

Umsögn frá Háskóla Íslands

Háskóli Íslands telur ekki rétt að útnefna Akureyri sem miðstöð málefna norðurslóða á Íslandi. Fyrir því liggur eftirfarandi rökstuðningur:

- 1) Málefni norðurskautsins verða æ mikilvægari í alþjóðasamfélaginu og hagsmunir Íslands af hagfelldri þróun á svæðinu eru mjög miklir. Þar af leiðandi er mikilvægt að leggja áherslu á að landið allt tilheyrir norðurslóðum.
- 2) Þar sem Ísland á mikilla hagsmuna að gæta á norðurslóðum, hvort sem við horfum til umhverfismála, samfélagsþróunar, viðskipta eða öryggismála, skiptir öllu máli að ýta undir og efla samstarf og samskipti allra sem eiga hlut að máli, en fjölmargar stofnanir og fyrirtæki sem stunda rannsóknir á norðurslóðum eða kenna sig við norðurslóðir á einhvern hátt eru staðsett víða um landið. Þar á meðal má nefna Rannsóknasetur um norðurslóðir við Háskóla Íslands, Hringborð Norðurslóða (e. Arctic Circle), Hafrannsóknarstofnun, Veðurstofu Íslands, Landhelgisgæslan og MATÍS.
- 3) Við Háskóla Íslands er starfrækt Rannsóknasetur um norðurslóðir sem stendur fyrir rannsóknum, útgáfu, opnum fundum og ráðstefnum tengt norðurslóðum, oft í samstarfi við utanríkisráðuneyti Íslands. Við Háskólann starfar einnig fjöldi fræðimanna á sviði náttúruvísinda, félagsvísinda og hugvísinda sem leggur stund á kennslu og rannsóknir á sviði norðurslóða. Þverfræðileg nálgun viðfangsefnisins er því til staðar í Háskóla Íslands, sem er forsenda þess að hægt sé að fjalla um helstu áskoranir norðurslóða á heildrænan hátt.
- 4) Háskóli Íslands fagnar því samstarfi sem hefur verið komið á á milli allra íslensku háskólanna undir formerkjum Háskóla norðurslóða (e. University of the Arctic). Allir íslensku háskólarnir hafa nú gerst aðilar að samtökunum og vinna saman að skipulagi vísindaráðstefnu sem haldin verður í Reykjavík haustið 2020 í samstarfi við Arctic Circle og formennsku Íslands í Norðurskautsráðinu. Þá situr prófessor við Háskóla Íslands í stjórn samtakanna. Telur Háskóli Íslands að hér hafi verið stigið stórt skref í átt að aukinni samvinnu í norðurslóðamálum á milli landshluta og að á því beri að byggja.

Virðingarfyllst,


Jón Atli Benediktsson
rektor Háskóla Íslands

Utanríkismálanefnd Alþingis
Berist til nefndasvid@althingi.is

14.01.2020

Utanríkismálanefnd Alþingis sendi Norðurslóðaneti Íslands til umsagnar tillögu til þingsályktunar um Akureyri sem miðstöð málefna norðurslóða á Íslandi., 182. mál.

Norðurslóðanet Íslands tekur undir greinargerð þá sem tillögunni fylgir, sem og niðurstöðu flm. um að málefni norðurslóða verði sífellt mikilvægari á alþjóðlegum vettvangi. Uppbygging þverfaglegs þekkingarsamfélags á Akureyri á sviði norðurslóða undanfarna áratugi hefur verið heillavænleg þróun og treystir þátttöku landsins í alþjóðasamstarfi. Málefni norðurslóða eru þess eðlis að þau almennt kalla á þverfaglega nálgun. Af þeirri ástæðu hefur gefið góða raun að beina á einn stað þvílíkum aðgreindum stofnunum, ekki aðeins hér á landi, heldur einnig í öðrum norðurslóðaríkjum þar sem svipaðar miðstöðvar hafa byggst upp með góðum árangri. Þá hefur reynslan sýnt okkur að þær stofnanir sem þegar eru staðsettar á Akureyri hafa haft töluverðan ávinning af nálægð sinni hver við aðra. Sterk miðstöð málefna norðurslóða á Íslandi mun tvímælalaust styrkja og styðja við það margvíslega starf sem fram fer víða um land og tengist norðurslóðum.

Embla Eir Oddsdóttir
Forstöðumaður
Norðurslóðanet Íslands
embla@arcticiceland.is
gsm: +864 5979

Gunnar Már Gunnarsson
Verkefnastjóri
Rannsóknabíng Norðursins við Háskólann Akureyri
gunnarmg@unak.is
gsm: +864 2051

Umsögn utanríkisráðuneytisins um tillögu til þingsályktunar um Akureyri sem miðstöð málefna norðurslóða á Íslandi

Hlutverk Akureyrar sem miðstöð málefna norðurslóða á Íslandi hefur styrkst á undanförunum árum, eins og rakið er í ofangreindri tillögu til þingsályktunar. Utanríkisráðuneytið fagnar þeirri þróun og tekur undir það sjónarmið að æskilegt sé að styðja enn frekar við hana, enda þjónar það hagsmunum Íslands að markvisst sé byggð upp þekking og sérhæfing á þessu sviði. Þess má geta að ráðuneytið hefur um árabíl átt í góðu samstarfi við ýmsa af þeim aðilum sem nefndir eru í tillögunni. Jafnframt má benda á að Alþingi hefur samþykkt auknar fjárveitingar til norðurslóðatengdrar starfsemi á Akureyri í tengslum við yfirstandandi formennsku Íslands í Norðurskautsráðinu.

Að mati utanríkisráðuneytisins er ofangreind tillaga hins vegar ekki tímabær, í ljósi þess að utanríkisráðherra hefur nýverið skipað þingmannanefnd um endurskoðun á stefnu Íslands í málefnum norðurslóða. Gera má ráð fyrir að norðurslóðatengt starf á Akureyri verði til umfjöllunar við þá stefnumótun.

Reykjavík, 14. janúar 2020.